

15 Papagei uss Paraguay

T./M.: Felix Gisler 04.2007

Är chunnt aagreist vo wyyt,
und gilt als Favorit:
Dr Papagei uss Paraguay
isch hiä än Mega-Hit!
Är winkt dr Mängi zuä,
staat gwagglig uff dä Schuä:
syys „outfit“ modisch unbequem
und sündhaft tyyr drzue.

Für n-äs Papagei-Solo
isch är extra aanä cho,
und dr Eerschi Pryys vum Wettbewärb
wird är locker ibercho.
Was mä da so umä redt,
het's chuun Konkurräntä dett,
da het's höchschtens nu än Amslä,
wo der Pryys äu gwinnä wett.

Aber d'Amslä chunnt vo hiä,
wiä diä ussgseet gwinnt diä niä!
Ihres schwarzi Chleid tuät eim truurig leid,
so-n-ä Show cha niämais ziä!
Und diä redt doch so wiä miär,
macht si z'Muul uff, dünkt's eim schiär,
äs tönt alles ä chli provinziell –
isch das nit ä bitzli stiär?

Doch bald scho im Verglyych
gheert mä, d'Amslä-Stimm isch ryych,
und dr Papagei uss Paraguay
krächzt wiä-n-äs liächt gsteerts Viech.
Und nu eppis fällt eim uff:
D'Amslä het ä langä Schnuuf,
variiert melodisch kreativ -
git äm Schluss nu einä druff.

Und was sell jetz d'Jury tuä?,
will dr Pöbel git kei Ruä -
Ja, im Grund isch es güllä-klar:
s'git ä nyywä Mega-Star!
Yyseri Amslä, offäsichtlich wahr,
isch ab hitt dr Super-Star!
Gämmer zuä, es isch chli sonderbar,
aber trotzdem isch es wahr.
Nei, wer das nit gheert,
der isch sälber gsteert,
s'isch d'Amslä, alles klar,

s'isch dr Super-Star!
D'Amslä, alles klar,
isch dr Mega-Star!
Und dr Papagei,
gaat scho wider hei,
zrugg uf Paraguay,
macht ä suurä Stei!
Wei-o-wei-o-wei!